

EMPIISA MU BUSIRAAMU

الأخلاق في الإسلام - أوغندي



جمعية الدعوة والارشاد ونوعية الجاليات في الزلفي
هاتف: 966 164234466 - فاكس: 966 164234477

الأخلاق في الإسلام

أعدّه وترجمه إلى اللغة الأوغندية
جمعية الدعوة والإرشاد وتوعية الجاليات بالزلفي
الطبعة الأولى: ١٤٤٥/ ٨ هـ.

ح) جمعية الدعوة والإرشاد وتوعية الجاليات بالزلفي ، ١٤٤٥ هـ

بالزلفي ، جمعية الدعوة والإرشاد وتوعية الجاليات
الأخلاق في الإسلام - أوغندي. / جمعية الدعوة والإرشاد
وتوعية الجاليات بالزلفي ؛ جمعية الدعوة والإرشاد وتوعية
الجاليات الزلفي - ط ١. - الزلفي ، ١٤٤٥ هـ

٤٨ ص ؛ ١٢/١٧ سم. - (1 ؛ ١)

رقم الإيداع: ١٤٤٥/١٨١٠٨
ردمك: ٦-٣١-٨٣٩٩-٦٠٣-٩٧٨

EMPISA MU BUSIRAAMU

الأخلاق في الإسلام

الحمد لله والصلاة والسلام على رسول الله أما بعد:

Tumutendereza era netumwebaza Allah kulw'ekyengera ky'obusiraamu kye yatuwa era n'atukubiriza okubeera n'empisa ennungi, era n'ategekera oyo abeera nazo empeera ennene So nga era ekimanyiddwa nti empisa ennungi kitendo mu bitendo bya ba Nabbi n'abalongoofu era ku lw'empisa ennungi omuntu abeera azirina asitulwa amadaala, era Allah yatenda nabbi we Muhammad (S.A.W) mu Aya eyamukunjaanyizaako empisa zonna ezisinga obulungi nga bw'agamba Allah mu Surat qalam Aya 4 agamba nti:

قَالَ تَعَالَى: ﴿وَإِنَّكَ لَعَلَى خُلُقٍ عَظِيمٍ﴾

Agamba Allah nti: "*Mazima ddala ggwe Muhammad oyina empisa ezisinga okuba ennungi ez'awaggulu*".

Era empisa ennungi zireetera omuntu okubeera nga ayagalwa era nga asaasirwa ate emize emibi gireetera omuntu okubeera nga asunguwalirwa ate

n'okubeera ow'ensalwa. Ate obuufu bwazo n'ebibala byazo byeyolefu ssi wano ku nsi wokka wabula ne ku nkomerero eri oyo abeera n'empisa ennungi, naddala ate singa Allah amugattira byombi; empisa n'okutya Allah. Nabbi (S.A.W) mu Hadiith ya Tirimidhi ne Haakim agamba:

قَالَ صَلَّى اللهُ عَلَيْهِ وَسَلَّمَ: "أَكْثَرُ مَا يُدْخِلُ النَّاسَ الْجَنَّةَ تَقْوَى اللَّهِ وَحُسْنُ الْخُلُقِ"

"Ekintu ekigenda okusinga okuyingiza abantu ejjana kugenda kubeera kutya Allah na mpisa nnungi".

Empisa ennungi: Kwe kubeera n'ekyenyi ekisanyufu eri abantu n'okiyamba abalala n'ebirungi gwe by'olina wamu n'obutanakuwaza bantu banno, kwoyongereza n'ebyo ebikakata ku musiraamu okukozesa mu bigambo ebirungi n'okukuuma obusungu n'okubufuga n'okuguminkiriza okukosebwa okumutuukako okuva eri abalala. Omubaka (S.A.W) mu Hadiith eyawandiikibwa Imaam Ahmed ne Bayihaqi ne Haakim agamba:

قَالَ صَلَّى اللهُ عَلَيْهِ وَسَلَّمَ: "بُعِثْتُ لِأَتَمِّمَ مَكَارِمَ الْأَخْلَاقِ"

Agamba omubaka (S.A.W) nti: *"Natumwa kujjuuliriza mpisa nnungi mu bantu"*

Era omubaka (S.A.W) n'alaamira Abu Huraira n'amugamba nga bwe kiri mu Hadiith eyawandiikibwa Bayihaqi nti:

يَا أَبَا هُرَيْرَةَ! عَلَيْكَ بِحَسَنِ الْخَلْقِ، قَالَ: أَبُو هُرَيْرَةَ: وَمَا حَسَنَ الْخَلْقِ يَا رَسُولَ اللَّهِ؟ قَالَ: تَصَلُّ مِنْ قِطْعِكَ، وَتَعْفُوا عَمَّنْ ظَلَمَكَ، وَتَعْطِي مَنْ حَرَمَكَ.

"Owange Aba Huraira, nkulaamira empisa ennungi. N'amubuuza nti zeeziliwa empisa ennungi owange omubaka wa Allah? N'agamba nti: kwe kuyunga oyo akutuddewo oluganda, era n'osonyiwa oyo akulyazaamanyizza, era n'owa oyo akummye."

Tunuulira muganda wange omusiraamu embeera ennungi n'empeera ezitatendwa mu bigambo bino ebyettendo. Yagamba omubaka (S.A.W) mu Hadiith eyawandiikibwa Imaam Ahmad nti:

قَالَ رَسُولُ اللَّهِ ﷺ:

"إِنَّ الرَّجُلَ لِيَدْرِكَ بِحَسَنِ خَلْقِهِ دَرَجَةَ الصَّائِمِ الْقَائِمِ"

"Mazima omuntu asobola olw'empisaze ennungi okutuuka ku ddaala ly'oyo asiiba era nga musitusi ekiro n'asaala esswala y'ekiro".

Era empisa ennungi omubaka (S.A.W) yaziteeka mu biraga obujjuvu bw'obukkiriza bw'omuntu. Agamba mu Hadiith nti:

قال رسول الله ﷺ: "أَكْمَلُ الْمُؤْمِنِينَ إِيمَانًا أَحْسَنَهُمْ خَلْقًا"

Agamba omubaka (S.A.W) nti: *"Omuntu asinga obujjuvu bw'obukkiriza y'oyo abasinga okuba n'empisa"*.

Era fumintiriza muganda wange omusiraamu ekigambo kya Nabbi (S.A.W) mu Hadiith eyawandiikibwa Atwabaraan egamba nti:

قال ﷺ: "أَحَبُّ النَّاسِ إِلَى اللَّهِ أَنْفَعُهُمْ لِلنَّاسِ، وَأَحَبُّ الْأَعْمَالِ إِلَى اللَّهِ - عَزَّ وَجَلَّ - سُرُورٌ تَدْخُلُهُ عَلَى مُسْلِمٍ، تَكْشِفُ عَنْهُ كَرْبَةً أَوْ تَقْضِي عَنْهُ دَيْنًا، أَوْ تَطْرُدُ عَنْهُ جُوعًا، وَلَأَنْ أَمْشِيَ مَعَ أَخِي الْمُسْلِمِ فِي حَاجَةٍ أَحَبَّ إِلَيَّ مِنْ أَنْ أَعْتَكِفَ فِي هَذَا الْمَسْجِدِ شَهْرًا"

"Omuntu asinga obuganzi eri Allah y'oyo asinga okubeera ow'omugaso eri abantu, era n'emirimu egisinga okubeera nga gyagalwa nnyo eri Allah omugulumivu, ly'essanyu ly'oyingiza mu musiraamu, mu kumujjirawo obuzito bwalina, oba okumusasulira ebbanja, oba okumugobako enjala, era nze okugenda ne muganda wange omusiraamu mbeere nga mumalira ekyetaago kye, kinsingira okutuula"

mu muzikiti okumala omwezi mulamba (nga nkola Itikaaf)".

Muganda wange omusiraamu, ekigambo ekyangu ennyo nga kirungi bw'okyogera n'enniya ennungi newekiba kitono nnyo, bw'okyogera okifunamu empeera. Naga bwagamba omubaka (S.A.W) mu Hadiith eyawandiikibwa Imaam Bukhari ne Muslim nti:

قال ﷺ: "والكلمة الطيبة صدقة"

"N'ekigambo ekirungi nakyo kubeera kusaddaaka"
(okifunamu empeera)

Nabwekityo olw'okuba nti mukigambo ekirungi kibeera n'obulungi buli omu bwayagala kuba kiteeka mu kifuba ky'omuntu essanyu, nekisembeza emitima era neky'agazisa emyoyo nekijjawo okuwalanagana. Era ky'ova olaba nga ennung'anyama y'omubaka ekubiriza omuntu okweyisa obulungi n'okwewala emize eginakuwaza abalala. Ky'ava agamba omubaka (S.A.W) mu Hadiith eyawandiikibwa Tirimidhi nti:

قال ﷺ: "اتق الله حيث ما كنت، وأتبع السيئة الحسنة تمحها،

وخالق الناس بخلق حسن"

"Tya Allah wonna w'oba oli, era bw'oba okoze ekibi, kigoberezeeko ekirungi (okwenenya), kijja kukisangulawo, era abantu bayise mu mpisa ennungi".

Empisa z'omuntu zitambula naye era zimugoberera wonna w'abeera era nezimufuula omuganzi omwagalwa eri abantu, nezimusembeza gyebali mu buli kkubo ly'akwata nabuli kifo mw'alaga.

Okutuusa n'entonji y'ekyokulya gy'ateeka mu kamwa ka mukyalawe nayo n'aba nga agifunamu empeera. Ng'omubaka bw'agamba (S.A.W) mu Hadiith eyawandiikibwa Imaam Bukhari egamba nti:

قال ﷺ: "وإنك مهما أنفقت من نفقة فهي صدقة، حتى اللقمة ترفعها إلى فيّ امرأتك"

"Mazima ggwe tewali lw'owaayo mubiweebwayo okujjako obeera osaddaase (ofunamu empeera) paka nebw'eba ntonji (emmere/ak'okulya konna) gy'oteeka mu kamwa ka mukyalawo".

Ate muganda wange omusiraamu ow'omukwano, kimanye nti abakkiriza baba b'aluganda, n'olwekyo kikakata ku musiraamu okwagala mugandawe musiraamu munne n'okumwagaliza ekyo naye ky'ayagaliza omutima gwe. Kale nno, tunuulira omutimagwo ky'ogwagaliza kyagalize ne

mugandawo omusiraamu, ate n'ekyo ky'owulira nga okitamwa, ne mugandawo kimwesambye kireke kumutuukako. Era nkwewaza okunyooma n'okukakkanya omuntu yenna eyakkiriza nti omuleziwe ye Allah, era n'obusiraamu y'eddiiniye era ne Nabbi Muhammad (S.A.W) ye nabbi we era omubakawe, kubanga ekyo yakitwewaza omubaka (S.A.W) nga bw'agamba mu Hadiith eyawandiikibwa Imaam Muslim egamba nti:

قال ﷺ: "بحسبِ امرئٍ من الشر أن يحقر أخاه المسلم"

"Kimala bumazi omuntu okuba nga akoze ekikolwa ekibi okubeera nga akkakkanya n'okunyooma mugandawe omusiraamu"

Nabwekityo muganda wange omusiraamu, ekkubo lino lyangu tolizibuwaza, ate era gumu ku miteeko gy'okusinza mw'ofuna empeera. Nabbi (S.A.W) yagamba Abi Dar-daa-i, nga bwekiri mu Hadiith nti:

قال ﷺ: "ألا أدلك على أيسر العبادات وأهونها وأخفها على البدن؟"

قال أبو الدرداء بلى يا رسول الله، فقال ﷺ: عليك بالصمت

وحسن الخلق فإنك لن تعمل مثلها"

Omubaka (S.A.W) yagamba Aba Dar-daa-i nti:
"Abaffe nkubuulireyo Ibaada esinga obwangu ate nga kyangu nnyo okugikweka ku mubiri

nebatagimanya? Abu Dar-daa-i n'ayanukula nti: Yye mbulira owange omubaka wa Allah: Nabbi (S.A.W) n'amugamba nti: nkulaamira okusirika n'okweyisa mu mpisa ennungi, mazima ggwe togenda kukolayo Ibaada egifaanana".

Era empeera z'omukkiriza z'afuna olw'empisaze ennungi zenkana n'empeera z'omukkiriza oyo asituka ekiro kyonna n'asaala era n'emisana nga abeera asiibye. Nga bw'agamba omubaka (S.A.W) nti:

قال ﷺ: إن المؤمن ليدرك بحسن خلقه درجة الصائم القائم

"mazima omuntu ow'empisa ennungi atuuka ku ddaala ly'omuntu asiiba emisana n'ayimirira n'ekiro nga asaala - swalat Laili"

Mu buufu obwo, yali nga swahaba ow'ekitiibwa Abi Dar-daa-i nga agamba nti mazima omuddu omusiraamu alongoosa empisaze okutuusa okulongoosakwe okwo bwe kumuyingiza ejjana. Era ate omulala n'akola emize emibi, okutuusa emize egyo lwe gimuyingiza omuliro.

OBUBONERO OBULAGA EMPISA ENNUNGI

Obubonero obulaga empisa ennungi bukunjanira mu bitendo ebyenjawulo, mubyo:

Kw'ekubeera nga omuntu alina ensonyi nnyingi, yeewala okunyiiza banne, muyitirivu wa kulongoosa era ayogera nnyo amazima, ate nga ebigambo bye bitono so ng'era akola nnyo emirimo emirungi, nyeewala nnyo okwogerayogera ebitagasa, ayisa bulungi b'awangaala nabo, ayunga oluganda, era muguminkiriza nnyo, ate nga yeebaza nnyo era nga asiima, ate nga wa magezi ku buli ky'aba akola era nga mukwaatampola, mwangu ayanguyira abantu ate era alumirirwa banne, takolimakolima ate era tavuma banne, Si waalugambo era nga tageya banne, ssimulimba, talina kakukuuzi ku banne, simukodo, talina nsalwa, ekyenyikye nga kiba kisanyufu ebiseera ebisinga. Ayagala kulwa Allah, era n'asiima kulwa Allah ate era n'asunguwala kulwa Allah.

Omuntu ow'empisa ennungi, yeewala nnyo ebinyiiza abantu, abanoonyeza bulijjo ebisonyiyisa (excuses) kw'ebyo byebaba beebagadde mu nsobi. Yeewala ne ssekweewala yenna okukettereza ensobi

z'abanne. N'olwekyo, omukkiriza tasuubirwa kuba na mize mibi mu mbeera yonna.

Omubaka (S.A.W) mu bifo bingi akakasa obukulu bw'empisa, era n'empeera ey'ensusso ezitowera ddala eri oyo atendebwa n'empisa ennungi. Nga bwekiri mu Hadiith eyawandiikibwa Twabaran egamba:

عن أسامة بن شريك قال: كنا جلوسًا عند رسول الله ﷺ: إذ جاءه أناس فقالوا: من أحب عباد الله إلى الله تعالى؟ قال: أحسنهم أخلاقًا.

Usaamah bun Shariik agamba nti: *"Twali tutudde ew'omubaka (S.A.W) abantu kyebaava bajja waali nebamubuuza nti: muddu ki asinga okubeera omwagalwa eri Allah? Omubaka (S.A.W) n'abaddamu nti: oyo abasinga okuba n'empisa ennungi"*

Era ne mu Hadiith endala eyawandiikibwa Imaam Ahmad egamba nti:

عن عبدالله بن عمر رضي الله عنهما قال: سمعت رسول الله ﷺ يقول: ألا أخبركم بأحبكم إلي، وأقربكم مني مجلسا يوم القيامة؟ قالوا نعم يا رسول الله، قال: أحسنكم خلقًا.

Ibun Umar agamba nti: Nawulira omubaka wa Allah (S.A.W) nga agamba nti: *"Abange mbabuulire gwensinga okwagala mummwe, era oyo agenda okuntuula ku lusegere ku lunaku lw'enkomerero? Nebamuddamu nti yye tubuulire owange omubaka wa Allah. N'agamba nti: y'oyo abasinga empisa ennungi mummwe".*

Era n'agamba mu Hadiith eyawandiikibwa Imam Ahmad egamba nti:

قال صَلَّى اللهُ عَلَيْهِ وَسَلَّمَ: "ما من شيء أثقل في ميزان العبد يوم القيامة من خلق حسن"

"Tewali kintu kyonna kigenda kuzitowa nnyo ku minzane ku lunaku lw'enkomerero okwenkana empisa ennungi".

EMPISA Z'OMUBAKA (S.A.W)

Omubaka wa Allah (S.A.W) yali nga wakati wa ba Swahababe nga alina empisa ezitatendwa mu bulungi era nga kifaananyi eky'okulabirako ekisinga obulungi ekiraga empisa ezo kw'akowoolera abantu, era nga asiga wakati wa baswahababe empisa ezo ezettendo mu bulungi nga kino kirabikira mu bikolwabye nga tannazibasigamu n'ebigambo bye ebyali nga ebyamagezi era ebibuulirira.

Anasi agamba mu Hadiith eyawandiikibwa Imaam Musilimu egamba nti:

عن أنس رضي الله عنه قال: خدمتُ النبي ﷺ عشر سنين، والله ما قال لي: أفِ قط، ولا قال لشيءٍ لِمَ فعلت كذا؟ وهلا فعلت كذا؟

"Naweereza Nabbi (S.A.W) okumala emyaka kkumi beddu, naye teyannekkaanyaako wadde, era teyannenyako nti lwaki okoze bw'oti wadde okungamba nti lwaki tewakoze bwoti!"

Era Anasi agamba mu Hadiith eyawandiikibwa Imam Bukhari ne Muslim nti:

وعنه رضي الله عنه قال: كنت أمشي مع رسول الله ﷺ وعليه بُرد غليظ الحاشية، فأدركه أعرابي فجبذه جبذة شديدة، حتى نظرت

إلى صفحة عاتق رسول الله ﷺ وقد أثرت به حاشية البرد من شدة
جذته، ثم قال يا محمد مر لي من مال الله الذي عندك، فالتفت
إليه رسول الله صلى الله عليه وسلم وضحك، ثم أمر له بعتاء.

"Nali ntambula ne Nabbi (S.A.W) nga alina ekitambaala ekiriko omudalizo nga mugumu, omunnamalungu n'amusisinkana, ky'ava amusika olusika olwamaanyi, nentunula ku bibegabega bya Nabbi (S.A.W) nendaba nga omudalizo gw'ekitambaala gumunuubudde olw'okusikibwa okwamaanyi kwebamusise, oluvannyuma omunnamalungu kyeyava amugamba nti: owange ggwe Muhammad, lagira bampe mu maali ya Allah eyo gyolina, nabbi (S.A.W) n'akyuka gyali n'aseka era n'alagira bamuwe".

Aisha yabuuzibwa nga bwekiri mu Hadiith eyawandiikibwa Imaam Muslim egamba nti:

وسئلت عائشة زوج النبي ﷺ: ما كان يفعل في بيته؟ قالت: كان يكون في مهنة - أي خدمة - أهله فإذا حضرت الصلاة يتوضأ ويخرج إلى الصلاة.

"Yali nga nabbi (S.A.W) akolaki ewakaawe? Yaddamu nti yali nga aweereza bakyalabe ku mirimo gy'awaka nga ayamba ku bakyalabe, wabula

esswala bweyatuukanga yafunanga wudhu n'agenda eri esswala".

Era agamba mu Hadiith eyawandiikibwa Tirimidhi nti:

عَنْ عَبْدِ اللَّهِ بْنِ الْحَارِثِ قَالَ: "مَا رَأَيْتُ أَحَدًا أَكْثَرَ تَبَسُّمًا مِنْ رَسُولِ اللَّهِ صَلَّى اللَّهُ عَلَيْهِ وَسَلَّمَ"

"Sirabangayo muntu n'omu asinga mubaka (S.A.W) kumwenya".

Era kimanyiddwa nti: mu mbeera z'omubaka wa Allah (S.A.W) yali nga mugabi nnyo nga takodowalira kintu kyonna, ate nga muzira tatiiririra muntu yenna kumazima, era nga mwenkanya teyeekubiira mu kulamula era nga wa mazima omwenkanya mu bulamu bwe bwonna.

Era agamba mu Hadiith eyawandiikkwa Imaam Bukhari ne Muslim egamba nti:

عن جابر رضي الله عنه قال: "ما سئل النبي ﷺ قط فقال لا"

"Nabbi (S.A.W) tasabibwangako kintu kyonna n'agamba nti nedda".

Era yali nga asaaga neba Swahaababe era nga ababeeramu, nga azannya n'abaana babwe abato nga abatuuzza ku mubiri gwe era nga ayanukula oyo

amuyise ku mukolo n'agendayo, era nga alambula abalwadde, nga akkiriza okwetonda kw'omuntu abeera amwetonedde.

Era yali nga ayita ba Swahababe n'amannya gabwe gebasinga okwagala era nga tasaza mumuntu nga ayogera. Era agamba Abi Qatadah nti:

عن أبي قتادة لما جاء وفد النجاشي قام النبي ﷺ يخدمهم، فقال له أصحابه: نكفيك، فقال إنهم كانوا لأصحابي مكرمين وإني أحب أن أكافئهم.

"Bwekyajja ekibinja okuva ewa Kabaka Najjashi, yasituka nabbi (S.A.W) abeere nga abaweereza (abalabirire) nebamugamba baswahababe, nedda tujja kukumalira. N'abagamba nti mazima bbo abantu bano baayisa bulungi nnyo ba swahaba baffe (amakulu baabayisa bulungi nnyo mu biseera lwebaasengukira gyebali e Habasha) nange njagala mbasasule".

Era yali nga agamba nti: mazima nze ndi muddu wa Allah ndya nga abalala abaddu bwe balya, era ntuula nga abalala abaddu bwe batuula, era yali nga yeebagala ku ndogoyi era nga alambula abanaku era nga atuula n'abaavu.

AMAZIMA

Mazima omusiraamu abeera wa mazima eri Katonda we, n'eri abantu bonna, mumbeeraze zonna aba wamazima, mu bigambobye, ne mu bikolwabye. Allah agamba mu Surat Tawuba Ayah 119 nti:

قال تعالى: ﴿يَا أَيُّهَا الَّذِينَ ءَامَنُوا اتَّقُوا اللَّهَ وَكُونُوا مَعَ الصَّادِقِينَ﴾

"Abange mmwe abakkiriza mutye Allah era mubeere n'aboogezi b'amazima".

Era n'agamba omubaka mu Hadiith eyawandiikibwa Ahmad egamba nti:

عن عائشة رضي الله عنها قالت: ما كان خلق أبغض إلى رسول الله صلى الله عليه وسلم من الكذب.

"Tewaliyo muze mubi ogwali gusinga okunyiiza omubaka wa Allah nga obulimba"

Era agamba mu Hadiith eya Maliki bwe yabuuzibwa nti:

سُئِلَ رَسُولُ اللَّهِ ﷺ: أَيُّكُونُ الْمُؤْمِنُ جَبَانًا؟ قَالَ نَعَمْ. قِيلَ لَهُ: أَيُّكُونُ الْمُؤْمِنُ بَخِيلًا؟ قَالَ نَعَمْ. قِيلَ لَهُ: أَيُّكُونُ الْمُؤْمِنُ كَذَابًا؟ قَالَ لَا.

Yabuuzibwa omubaka (S.A.W) nti: *"abaffe omukkiriza asobola okubeera omutiitizi? N'ayanukula nti yye. Nebamugamba nti: abaffe omukkiriza asobola okubeera omukodo?"*

N'ayanukula nti yye, Nebamugamba nti: abaffe omukkiriza asobola okubeera omulimba? N'agamba nti nedda."

N'okulimba mu mateeka g'eddiini ky'ekimu ku bintu ebibi ennyo, era kyekika ky'obulimba ekisinga obubi era empeera yakyo muliro. Nga bw'agamba omubaka (S.A.W) mu Hadiith eyawandiikibwa Imaam Bukhari egamba nti:

قال رسول الله ﷺ: "من كذب عليّ متعمداً فليتبوأ مقعده من النار"

"Omuntu yenna annimbisa (n'amussaako byataayogera) nga agenderedde yeetegekere ekifo kye mu muliro".

Era eddiini yaffe eno ey'obusiraamu, etukubiriza okusiga amazima mu bifuba by'abaana okutuusa lwe banaakivubukirako. Nga bwe kiri mu Hadiith eyawandiikibwa Imaam Ahamad;

فعن أبي هريرة رضي الله عنه عن رسول الله ﷺ قال: من قال لصبي: تعال، هاك، ثم لم يعطه شيء فهي كذبة.

Agamba Abi Hurairat nga agijja ku Nabbi (S.A.W) yagamba nti: *"Omuntu yenna agamba omwana omuto nti jangu, kwata, oluvannyuma ate n'atabaako ky'amuwa, obwo buba bulimba"*.

Bwatyo omubaka (S.A.W) yakubiriza abantu ba Ummah ye okwewalira ddala ekiyitibwa obulimba, nebwo'oba nga asaaga. Era n'alagaanyisa ennyumba mu makkati g'ejjana eri oyo eyeewala obulimba ne bw'aba nga asaaga. Nga bwe kiri mu Hadiith eyawandiikibwa Abu Dauda:

قال رسول الله ﷺ: انا زعيم بيت في وسط الجنة لمن ترك الكذب وإن كان مازحا.

Nabbi (S.A.W) agamba nti: *"Mzima ndagaanyisa ennyumba eri mu makkati g'ejjana eri oyo eyaleka obulimba newankubadde nga yali asaaga"*.

N'omusuubuzi ayinza okulimba nga atunda ebyamaguzi bye mu kunnyonyola agula, naye omubaka (S.A.W) naye yamwekesa obulimba obwo. Nga bwe kiri mu Hadiith eyawandiikibwa Imaam Bukhari egamba nti:

قال رسول الله ﷺ: لا يجل لمسلم، يبيع سلعة يعلم أن بها داء يعنى عيب إلا أخبر به.

Omubaka (S.A.W) agamba nti: *"Tekikkirizibwa eri omusiraamu okutunda ekyamaguzi ky'amanyi nti kiriko akamogo, okujjako nga amaze okukategeeza omuguzi"*.

OBWESIGWA

Obusiraamu bulagira abagoberezi baabwo okutuukiriza obwesigwa era okubeera nga buli muntu atunuulira nnyo omuleziwe nti amulaba ku buli mulimo gwonna gw'aba akola, gubeere omulimo guno mutono oba gube nga munene.

Omusiraamu abeera wa mazima mu kutuukiriza ebyo Allah bye yamulaalikako, era n'aba wa mazima mu nkolaganaaye n'abantu abalala. N'okubeera ow'amazima, kw'ekubeera nga wekuuma nnyo okulaba nga otuukiriza omulimo ogwo oguba gukulaalikiddwako mu ngeri esinga obujjuvu oba obulungi.

Allah agamba mu Surat Nisaa-i Aya 58 nti:

قال تعالى: ﴿إِنَّ اللَّهَ يَأْمُرُكُمْ أَنْ تُوَدُّوا الْأَمَانَاتِ إِلَىٰ أَهْلِهَا، وَإِذَا حَكَمْتُمْ بَيْنَ النَّاسِ أَنْ تَحْكُمُوا بِالْعَدْلِ﴾

"Mazima Katonda abalagira okutuukiriza n'okuzzaayo obwesigwa eri bannyinibwo, era bwe muba nga mulamula wakati w'abantu, mulamuze bwenkanya".

Era omubaka (S.A.W) yagamba mu Hadiith eyawandiikibwa Imaam Ahmad nti:

قال صلى الله عليه وسلم: "لا إيمان لمن لا أمانة له"

Agamba omubaka (S.A.W) nti: *"Tewali bukkiriza eri oyo atalina bwesigwa"*

Era obwesigwa tekitegeeza kukuuma bitereso kyokka nga abasinga bwe baakitegeera, wabula kibuna ebintu bingi. N'okukuuma obwesigwa kw'ekubeera nga omuntu akkiriza okubuulirirwa ku buli mulimo gw'aba aweereddwa, gubeere mu byamulaalikwako ebye ddiiniye, oba ebyo eby'edduniyaye.

OKWETOWAZA

Omusiraamu agwanidde okwetowaza mu buli mbeera etali y'akumukakkanya. Era tekikkirizibwa eri omusiraamu okubeera nga yeekuza. Nga bw'agamba Allah mu Surat Shuaraau Aya 215 nti:

قال تعالى: ﴿واخفض جناحك لمن اتبعك من المؤمنين﴾

"Kakkanya ebiwawaatirobyo (beera mwetowaze) eri oyo akugoberera mu bakkiriza".

Ate omubaka (S.A.W) yagamba mu Hadiith eyawandiikibwa Imaam Muslim nti:

قال صلى الله عليه وسلم: "ما تواضع أحد لله إلا رفعه"

"Tayinza kwetowaza omu mummwe ku Iwa Allah, okujjako nga amusitula".

Era n'agamba omubaka (S.A.W) mu Hadiith eyawandiikibwa Imaam Muslim nti:

قَالَ صَلَّى اللَّهُ عَلَيْهِ وَسَلَّمَ: "إِنَّ اللَّهَ أَوْحَى إِلَيَّ أَنْ تَوَاضَعُوا حَتَّى لَا يَفْخَرَ أَحَدٌ عَلَى أَحَدٍ وَلَا يَبْغِيَ أَحَدٌ عَلَى أَحَدٍ"

Agamba omubaka (S.A.W) nti: *"Mazima Allah asizza obubaka gyendi n'agamba nti abange mubeere beetowaze okutuusa omu mummwe aleke kwewaanira ku munne era omu mummwe aleke kulumbagana munne"*.

Nga ne mububonero obweyolefu obulaga okwetowaza, kw'ekubeera nga omuntu atuula n'abanaku, n'abaavu, n'otabalaga nti waawaggulu (wa kitiibwa), n'okubeera nga ekyenyikyo buli kaseera kiriko akamwenyumwenyu gyebali, n'obuteeraba nti ggwe mulungi kaalala okusinga abalala.

Nabbi (S.A.W) newankubadde nga ye Nabbi wa Ummah eno, naye olw'obwetowaze bweyalina, yayeranga enjuye, n'akama n'embuzi, neyelongooseza n'engoyeze, yalyanga emmere n'abakozibe oba n'omukoziwe, yagendanga mu katale neyeegulira ebintu, yakwatanga mungalo z'abantu bonna abaavu n'abanaku n'abagagga nabuli omu.

ENSONYI

Ensonyi kitundu ku bitundu by'obukkiriza. Era ensonyi tezirina kabi ke zireeta okujjako ebirungi ebyereere. Nga nabbi (S.A.W) bweyakitulaga mu Hadiith eyawandiikibwa Imaam Bukhari ne Muslim. So nga n'ekyokulabirako ekisinga obulungi mumpisa zino ezettendo, ye mubaka Muhammad (S.A.W) kuba nti yali muyitirivu wansonyi nga bwe kiri mu Hadiith eyawandiikibwa Imaam Bukhari:

عن أبي سعيد قال: فإذا رأى شيئاً يكرهه عرفناه في وجهه

Agamba Abi Saed nti: yali nga nabbi (S.A.W) "*Nga bw'alaba ekintu ekimutama kyatasimye, tumutegeerera ku kyeniyikye*".

Wabula ensonyi z'omusiraamu, tezimugaana kwogera kigambo eky'amazima oba okunonya okumanya kukyo, oba okulagira empisa ennungi oba okuziyiza emize emibi. Nga era Ummu Sulaim bwezitaamuziyiza kugamba nabbi (S.A.W) nti: owange omubaka wa Allah, mazima Allah takwatibwa nsonyi kumazima. Abaffe omukyala anaaba singa abeera yelooteredde? Omubaka (S.A.W) n'amuddamu nga bwekiri mu Hadiith eyawandiikibwa Imaam Bukhar nti:

Omubaka yamwanukula nti: *"Yye bw'aba nga alabye amazzi"*.

Wabula ensonyi ziziyiza omuntu okukola ebikolwa ebibi oba okubeera omukendeevu mw'ebyo byeyalaalikibwako mu mirimo emirungi, oba okwatuukiriza ebyama by'abantu n'okwonoona gyebali.

So nga n'ensonyi ku Allah zezitekwa okuweebwa ekifo ekisooka. Omukkiriza atekwa okukwatibwa ensonyi eri omutonziwe, oyo eyamutonda n'amulindiggulako ebyengera enfaafa, akwatibwa ensonyi okulaba nga tabeera mukendeevu mu kugondera oba okwebaza ebyengera by'amuwa. Nga bw'agamba omubaka (S.A.W) mu Hadiith eyawandiikibwa Imaam Bukhari nti:

Agamba omubaka wa Allah (S.A.W) nti: *"Allah y'Asinga okugwana akwatirwa ensonyi okusinga abantu"*

EMIZE EMIBI

Obulyazaamanya

Omusiraamu omutuufu tasaana kulyazaamanya muntu yenna kubanga obulyazamaanya bwaziyizibwa mu busiraamu. Nga bw'agamba Allah mu Surat Furqan Aya 19:

قال تعالى: ﴿ومن يظلم منكم نذقه عذابا كبيرا﴾

"N'oyo analyazaamanya mummwe, tugenda kumukombya kukibonerezo ekinene".

Era nemu Hadiith Alqudus eyawandiikibwa Muslim:

قال تعالى: "يا عبادي إني حرّمت الظلم على نفسي وجعلته بينكم

محرمًا، فلا تظالموا"

Agamba nabbi (S.A.W) nti: *"Allah yagamba nti: abange abaddu bange, mazima nze neeziyizaako obulyazaamanya era nembubaziyizaako nammwe (buli haraam) kale temwelyazamanyanga".*

Obulyazamaanya bulimu emiteeko esatu, era gyegino wammanga:

1) Okulyazaamanya kw'omuuddu kw'alyazaamanya Katondawe nga bw'agamba Allah mu Surat u Baqara Aya 254 nti:

قال تعالى: ﴿وَالْكَافِرُونَ هُمُ الظَّالِمُونَ﴾

"N'abakafiiri be balyazaamanya"

Era bubeera mu kugatta ku Allah ebintu ebirala. Mu kumusinja, omuntu n'abeera nga Ibaada ezimu azijja ku Allah n'azikolera ebitonde bya Allah, ekintu ekikyamu ennyo.

Allah agamba mu Surat luqman Aya 13:

قال تعالى: ﴿إِنَّ الشَّرْكَ لَظُلْمٌ عَظِيمٌ﴾

Agamba Allah nti: *"Mazima Shiriki bulyazamaanya bunene nnyo"*.

2) Okulyazaamanya kw'omuuddu eri muddu munne, nga kino kibeerawo mu kubanakuwaza n'okubakosa mu bitiibwa byabwe, oba ku mibiri gyabwe, oba mu maali yabwe mu ngeri etali ya mazima. Agamba omubaka mu Hadiith ya Bukhari

قال صلى الله عليه وسلم: "كل المسلم على المسلم حرام، دمه، وماله،

وعرضه"

Yagamba omubaka (S.A.W) nti: *"Buli musiraamu ku musiraamu munne tekikirizibwa ku yye okuyiwa omusaayigwe n'okutwala emmaaliye n'okutyoboola ekitiibwa kye"*.

Era n'agamba mu hadiith eyawandiikibwa Imaam Bukhari nti:

قال صلى الله عليه وسلم: "من كان عنده مظلمة لأخيه من عرض أو شيء فليتحلله منه اليوم قبل أن لا يكون دينار ولا درهم، إن كان له عمل صالح أخذ منه بقدر مظلمته وإن لم يكن له حسنات أخذ من سيئات صاحبه فحمل عليه"

Agamba omubaka (S.A.W) nti: *"Yenna alina kyeyalyazaamanya mugandawe omusiraamu, gamba nga okutyoboola ekitiibwa kye, oba ekintu ekirala, abeere nga akyejjako (akimuddize) kati nga tekinnaba kutuuka kiseera nga takyasobola kusasula mu ssente nga Dinaar oba Diriham (oba Shillings), wabula (ku lunaku lw'enkomerero) bw'aliba nga alinawo emirimu emirungi, gyegirikwatibwa ne basasula amubanja. Bw'aliba tagirina, balikwata ebibi by'oyo amubanja nebabimutikka"*.

3) Obulyazamaanya bw'omuntu nga alyazaamanya omutima gwe.

Allah agamba mu Surat Baqara Aya 57 nti:

وما ظلمونا ولكن كانوا أنفسهم يظلمون

"Tebaatulyazaamanya wabula bbo bennyini beebaali beeryazaamanya"

Omuntu okwebagala ebikolwa ebyaziyizibwa buba bulyazaamanya nga omuntu yeryazaamanya, kubanga abeera akakaseeko ebibonerezo okuva eri Allah.

ENSAALWA

Ensaalwa muze mu mize emibi, era omusiraamu ateeddwa okwewala ensaalwa, kubanga bw'oba nayo, obanga awakanya engabanya Allah gyeyagabanya ebyengera bye wakati w'abaddube. Nga Allah gw'agamba mu Surat Nisaa-i Aya 54:

قال تعالى: ﴿أَمْ يَحْسُدُونَ النَّاسَ عَلَىٰ مَا آتَاهُمُ اللَّهُ مِنْ فَضْلِهِ﴾

"Nandiki oba bakwatibwa abantu ensalwa kw'ebyo Allah bye yabawa mu birungi bye"

N'ensalwa ya mirundi ebiri

1. Okwagala ekyengera munno ky'alina kimuveeko ggwe okifune. Okugeza nga ensimbi, ekitiibwa, obukulembeze n'ebiringa ebyo.
2. Okwagala ekyengera munno ky'alina kimuveeko, newankubadde nga bwe kimuvaako, ate ggwe togenda kukyeddiza (mumbeera ya kifiiriza).

Nabbi (S.A.W) yagamba mu Hadiith eyawandiikibwa Abu Dauda nti:

قال ﷺ: إياكم والحسد، فإن الحسد يأكل الحسنات كما تأكل النار الحطب أو الحشب.

"Mbeewaza ensalwa kuba ensaalwa erya ebirungi by'omuntu nga omuliro bwegulya enku".

Wabula bwewegomba okufuna ekyo ekifaanana ekyamunno, kyokka nga munno tekimuvuddeeko, eyo teba nsaalwa.

OKUKWENYAKWENYA

Omusiraamu abeera omuntu abulirira bagandabe era nga tabakwenyakwenya, wabula abaagaliza ekyo naye kyeyeeyagaliza. Omubaka (S.A.W) ky'ava agamba mu Hadiith eyawandiikibwa Imaam Muslim nti:

قال صلى الله عليه وسلم: من غشنا فليس منا.

Omubaka (S.A.W) agamba nti: *"Omuntu atukwenyakwenya, ssi waamuffe (aleese ebikolwa ebitali bya bantu ba Ummah waffe)".*

Era n'agamba mu Hadiith era eyawandiikibwa Imaam Muslim:

أن رسول الله صلى الله عليه وسلم مر على صبرة (أي كومة) طعام فأدخل يده فيها، فنالت يده بللا، قال (ما هذا يا صاحب الطعام؟ قال أصابته السماء (أي المطر) يا رسول الله. قال: "أفلا جعلته فوق الطعام حتى يراه الناس من غشنا فليس منا"

Agamba nti: mazima omubaka (S.A.W) "*Lumu yayita mu kifo omutundirwa emmere, ky'ava ayingiza omukono gwe mu emu ku nsawo z'emmere (obuwunga) wansi munda negujjayo emmere eyali eyoonese (obuwunga obutobye). Nabbi (S.A.W) n'agamba nyiniyo nti: kiki kino owange ggwe nannyini mmere? N'amuddamu nti: emmere eyo enkuba yajikuba owange omubaka wa Allah. Nabbi n'amugamba nti lwaki tewagitadde kungulu kw'emmere kuno nebagiraba abantu abagula (amakulu nebagula nga bagirabye nti yakubwa enkuba) n'agamba omubaka nti: omuntu yenna atukwenyakwenya tabeera wa mufte*".

OKW'EKUZA N'OKWEMANYA

Omuntu asobola okw'ekuza neyemanya olwa (irimu) okumanya kwalina neyekuliza ku bantu era n'abakkakkanya n'atuuka n'okukkakkanya bamanyi banne. Ate era asobola okw'ekuliza ku bantu olw'ebyobugagga by'alina eyo n'eba nga y'ensonga

y'okwekuz'akwe. Ate omulala neyeekuliza ku bantu olw'amaanyi g'alina, oba obuyinza bwalina, n'ebirala ebiringa ebyo.

Wabula omusiraamu owamazima atekwa okwewala okwemanya kuno n'okukwewaza banne. Era alina okujjukira nti Shayitwani *Ibliisi* ensonga eyamujjisa mu jjana (nebajigobayo) kwali kw'ekuza, okwekuluntaza, n'okwemanya nti yaakitalo nnyo, bwe baagiragira okuvunnamira Adam n'eddamu nti: Nze musinga obulungi, natondebwa mu muliro ate yye n'omutonda mu ttaka. Eyo n'ebeera ensonga eyagobya Ibiliisi mu kusaasira kwa Allah.

Egisobola okutaasa omuntu okwejjamu okw'ekuza n'okwemanya, ye muntu okumanya era n'akakasa nti ebyengera by'alina (irimu, maali n'ebirala) Allah yeyabimuwa era alina obusobozi obubimujjako akaseera konna.

ENSONGA EZIYAMBA OMUNTU OKUFUNA EMPISA.

Tewali kubuusabuusa nti ekimu mu bisinga okuba ebizibu, ye muntu okukyusa empisaze ezo omutimagwe kwegwazimbirwa (engeri gye yakuzibwamu), so nga ekyo omuntu tagifuula nsonga emusonyiyisa, era tetulina kukitwala nti tekisoboka.

Wabula waliwo ensonga ez'enjawulo, nga singa omuntu aba azeekutteko, Allah ayisizaako empisaze nezikyuka era n'afuna empisa ennungi. Ensonga ezo mw'emuli zino wammanga:

1. ***Okulongoosa enzikiriza (Aqeeda)***. Ensonga ya Aqeeda eno nkulu nnyo, kubanga ebiseera ebisinga obunji, enneeyisa y'omuntu esinziira ku ndwooza y'omuntu oyo gy'alina era n'ekyo ky'akkirizaamu mu nzikirizaye, era ekyo kw'akolera eddiiniye.

Aqeeda ebeera enzikiriza, era nga abasinga okuba n'enzikiriza enzijuva mu bakkiriza, y'oyo abasinga okuba n'empisa. Kitegeeza nti, singa omuntu abeera n'enzikiriza ennungi entuufu, n'empisaze ziba ziyina okulongooka olw'okugoberera obukkiriza obwo.

Omuntu bw'aba ne Aqeeda entuufu, emuwaliriza okubeera n'empisa ennungi, gamba nga obuntubulamu, obuyonjo, obukkakkamu, obukwatampola, obwetowaze n'ebiringa ebyo, ate era n'emuziyiza okuba n'emize emibi okugeza nga obulimba, obubbi, obulyazaamanya, omululu n'ebirala ebiringa ebyo.

2. **Okusaba:** Okusaba kuno mulyango mugazi era munene. Singa omuddu aggulirwawo omulyango ogwo ogw'okusaba, olwonno bimujjira ebirungi eby'olutentezi era n'emikisa negimweyongera. Omuntu ayagala okufuna empisa ennungi era ajjibweko emize emibi, alina kudda eri Allah amusabe, kubanga Yye Allah talina kyatasobola, ajja kukukyusa ofuuke omuntu omulamu.

Osaana okimanye nti okusaba kikulu nnyo mu bulamu bw'omuntu, Ky'ova olaba nti nabbi (S.A.W) ye yasinganga okwewombekera omuleziwe Allah nga amusaba amulongooseze empisaze. Yali nga asaba mu dduwa eziggulawo esswala nga bwe kiri mu Hadiith eyawandiikibwa Imaam Muslim nti:

كان صلى الله عليه وسلم يقول: اللَّهُمَّ اهْدِنِي لأحسن الأخلاق لا يهدي لأحسنها إلا أنت، واصرف عني سيأها لا يصرف عني سيأها إلا أنت.

Agamba nti: yali nga omubaka (S.A.W) asaba nga agamba nti: *"Katonda wange nnunjamya eri empisa ennungi, kuba tewali alunjamya muntu ku mpisa ezo ennungi atali ggwe. Era nkusaba ompugule nneme kugwa mu mize mibi, kubanga teri asobola kumpugula butagigwamu okujjako Ggwe"*

3. **Okukola kaweeefube:** Okukola kaweeefube kugasa nnyo mu mulyango guno, kuba omuntu akola kaweeefube ku mutima gwe okubeera nga yeeyisa bulungi, era neyerwanako okukola kaweeefube ku mutimagwe n'agulwanyisa okulaba nga tegumusuula mu mize emibi. Kino bw'akyefubako afunamu ebirungi bingi ddala, era n'awona obubi obuba bubunye wonna. Kimanyiddwa nti mu mpisa mulimu ezatondebwa mu butonde bw'omuntu, ate newabaawo n'ezo z'afuna okusenziira mu bantu b'awangaaliramu.

Bwetugamba nti kola kaweeefube w'okulwanyisa omutima, tetutegeeza nti kikolere omwaka gumu oba ebiri okiveeko, nedda, wabula kikole

obuwangaazibwo bwonna. Kimanye nti mukulwanyisa omutima oba okola Ibaada n’olwekyo togayaala kubanga omutima gukyukakyuka. W’ogugayaalirira gusobola okuseerera negukukozesa ensobi. Kat olina kulemerako.

Allah agamba mu Surat Hijiri Aya 99 nti:

قال تعالى: ﴿واعبد ربَّك حتى يأتيك اليقين﴾

*"Sinza Katondawo okutuusa okufa
lwekunaakutuukako"*

4. **Okwebalaabalamu.** Okwebala kuno kw’ekubeera nga singa obeera olina ekibi ky’okoze (emize omibi gy’okoze) weekuba mu mutima newennyamira, n’oleeta enniya ey’obutaddamu kukikola n’okwetonda neweetonda.
5. **Okulowooza ennyo ku bibala by'empisa ennungi.** Kubanga okulowooza ku mpisa n’okufumintiriza ku biki ebiyinzira okuzivaamu, ekyo ky’ekimu ku bisinga okuyamba omuntu okubeera nga akola empisa ennungi n’okuzeeyunira buli kiseera.
6. **Okutunuulira enkomerero y’abeemize emibi,** n’okufumintiriza ku ngeri emize egyo

bwe gibatadde mu kubonaabona, n'okwejjusa eby'olubeerera, nebatuuka n'okufuna obusungu ku mitima gyabwe eri bannabwe n'okufafaaganirwa okutatendwa.

7. **Obutakutukawo na ssubi** nti omutimagwe gukyasobola okukyuka n'afuuka omuntu mulamu. Omusiraamu tasaana kuggwamu suubi. Alina okukimanya nti Allah asobola okumutereeza n'afuuka omuntu mulamu ekiseera kyonna. N'olwekyo omusiraamu alina okukola kaweeube okulaba nga ekirungi ky'aluubirira akituukako era n'afuba n'okwejjamu obwo obumogo bwe.
8. **Okwewala akasunguyira.** Wabula fuba okulaba nga weemanyiiza okumwenya, kubanga okutunula mu kyenya kya mugandawo (omusiraamu) n'akamwenyumwenyu, obeera osaddaase. Nga Nabbi (S.A.W) bweyagamba mu Hadiith eyawandiikibwa Tirimidhi nti:

قال النبي ﷺ: تبسمك في وجه أخيك لك صدقة.

"Okumwenyakwo nga otunudde mu kyenya kya mugandawo, nayo ebeera Saddaaka gyoli"

Era n'agamba mu Hadiith eyawandiikibwa Imaam Muslim nti:

قال ﷺ: لا تحقرن من المعروف شيئا ولو أن تلقى أخاك بوجه طلق

Omubaka (S.A.W) agamba nti: "*Togayanga omulimu gwonna nebwegubanga mutono nnyo, nnewkuba kuisinkana mugandawo omusiraamu n'omutunulako nga olina akamwenyumwenyu ku matama*"

9. **Okwesonyiwa:** Okwesonyiwa n'oleka (oyo aba akusobezza) y'emu ku mpisa ezisinga okuba ennene mu bulungi, era zo zombi ziyamba okusigalawo kw'omukwano n'okwagalana n'okubikuuma saako okuziyiza obulabe obwandivudde mukwesojja n'okwewalana nga olemeddeko.

10. **Obukwata mpola:** Obukwata mpola nabwo yeemu ku mpisa ezisinga okubeera ennungi, era n'okuyamba banannyini magezi. Obukwata mpola kw'ekubeera nga omuntu aguminkiriza natayanguyiriza kunyiiga nakulaga busungu. Kino tekitegeeza nti omukwata mpola tanyiiga oba talina kunyiiga, nedda nga omutonde asobola okunyiiga, wabula bw'abaako ekimunyiizizza, afuga obusungu n'atayanguwa

kusalawo kya kukola nga akyaliko obusungu. Omuntu alina ekitendo kino, abeera waawaggulu nnyo kubanga abamwagala beeyongera, ate abamufitina ne bakendeera kubanga obukwatampola bumusobozesa okukola ekintu ekituufu mu budde obutuufu n'atagwa munsobi.

11. ***Okwewala abantu abalina endowooza enfu:*** Abantu abo ebiseera ebisinga tebabaako kye bakwongerako. N'olwekyo bw'obesonyiwa n'obeewala n'otabawa buddebwo, kikuuma ekitiibwa kyo era nekikuwa n'emirembe mu mutimagwo kubanga obeera weewaze okuwuliriza ebikunakuwaza. Nga bw'agamba Allah mu Surat A-araaf Aya 199 nti:

قال تعالى: ﴿خُذِ الْعَفْوَ وَأْمُرْ بِالْعُرْفِ وَأَعْرِضْ عَنِ الْجَاهِلِينَ﴾

'Sonyiwa, olagire empisa ennungi, wesambe abatamanyi'

12. ***Okw'ewala okuvuma.***
13. ***Okulabira abakukoszza ku mutima:*** Abantu betuwangaala nabo, kizibu obutakunyiiza. Naye bw'olwana ennyo n'otasiba busungu ku mutima, kikuyamba okutukuza omutima gwo, n'ogujjamu obukukuuzi eri banno. Naye buli

Iw'osiba obusungu ku mutima, kikuleetera okukyawa banno buli kiseera n'omutima okwennyika, anti buli lw'olowooza ku gundi eyakukola ekikyamu ate obusungu nebuttuka buto, olwo n'emirembe negikuggwako. Buli lw'obeera awo nga buli kaseera ojjukira nti gundi yannyiza, gundi yankola bwati, abantu abo oba tosobola kuwangala nabo bulungi, era ggwe kennyini weekaluubiriza obulamu. N'olwekyo osaana okugezaako okwerabira ekigero ky'osobola okwerabira.

14. ***Okusonyiyira ddala*** okutaliiko kujuza yenna aba yakusobyako, era n'obeera nga okunakuwazibwa okwo ate ggwe okusasulamu birungi, amakulu akunakuwazizza ate ggwe n'omuyisa bulungi, eyonno nsonga nkulu nnyo mu kusitula omuntu mu madaala. Allah amusitula nayo era ekuyamba okufuna obutebenkevu mu mutima n'okusitula omuntu obutaba mu mbeera ya kwesasuzza.
15. ***Okubeera omugabi ennyo:*** Obugabi kitendo ekitenderezebwa obulungi bwakyo, ate era nga obukodo bwe kiri ekitendo ekibi era ekivumirirwa, kuba obugabi buleeta omukwano nebujjawo obulabe nebutteekawo

okujjukirwako ebirungi era nebukweka obumogo n'ebirala.

16. ***Okusuubira empeera okuva eri Allah:*** Okusuubira empeera okuva eri Allah nsonga eyamba omuntu okufuna empisa ennungi kubanga eyamba omuntu okubeera omuguminkiriza n'okukola kaweeube ku mutimagwe olw'okuguminkiriza okunyizibwa n'okunakuwazibwa. Singa omuntu ono abeera n'okukakasa nti Allah ajja kumusasula kulw'empisaze ennungi, n'okukolakwe kaweeube ku mutimagwe, omuntu ono ajja kwekuuma nnyo okulaba nga yeeyisa bulungi, era ekyo kimuwewusize ku buzibu n'okunakuwazibwa by'afuna mu kkubo eryo.

17. ***Okw'ewala okunyiigira abantu:*** Kubanga okusunguwala lyanda erijja mu mutima gw'omuntu nerimuwaliriza okulumba, okwesasuzza n'okuvuma. Era singa omuntu aba tafuze busungu bwe mukiseera awo nga abadde asunguwadde abeera yekakkanyizza. So nga ate bwaba abufuze abeera akuumye ekitiibwa kye n'ekifookye ekyawaggulu, era n'abeera nga awonye okubeera mu basobola

okwejjusa n’okwetonda. Omubaka atugamba mu Hadiith eyawandiikibwa Imaam Bukhari:

عن أبي هريرة رضي الله عنه قال: جاء رجل فقال: يا رسول الله، أوصني. فقال ﷺ: لا تغضب ثم ردد مرار فقال لا تغضب.

Abi Huraira agamba nti: *"Omusajja yajja eri Nabbi (S.A.W) n’amugamba nti owange omubaka wa Allah, nsaba onnaamire. Omubaka n’amugamba nti tosunguwalanga, n’amuddamu emirundi omubaka n’amugamba nti tosunguwalanga"*

18. **Okukkiriza okubuulirirwa** okulungi okw’obukakkamu n’okuteeka munkola ekyo ekirungi era bwe baba bakulaze ekyo ky’olinamu obukendeevu, n’obeera nga okubiriza omutima gwo okulaba nga okikomya n’okireka, kubanga okulongooka kw’omutima tekusobola kutuukirira nga omuntu weesuuliddeyo gwa naggamba, tofaayo kukyusa bumogo bw’olina.

19. Omuntu okubeera nga akola omulimo oguba gumuweereddwa okukola munkola esinga okuba ennungi era enzijuvu, okutuusa lw’abeera nga awona okunenyezebwa n’okukakkanyizibwa, n’okuba nga ayingira mu mbeera y’okwekakkanya nga yetonda.

20. ***Okukkiriza ensobi*** bw'eba nga ekoledwa, n'okwewala okujilwanirira. Ako nno kaba kabonero kampisa nnungi era kino eky'okukkiriza ensobi kiyamba obutagwa mu bulimba. N'olwekyo okukkiriza ensobi kitendo kya mpisa nungi era kisitula nannyini kyo nekimussa mu madaala agaawaggulu.
21. ***Okwenywereza ku mazima***: Kino kireeta ebibala ebirungi ennyo ddala kubanga okwenywereza ku mazima kusitula ekitiibwa ky'omuntu nekumuteeka muddaala eryawaggulu. Era kutaasa nannyini kwo obukyafu bw'obulimba nenjogera ez'obunyomoofu wamu n'okwekakkanya kw'okwetonda era amazima gakuuma omuntu obutanyizibwa bantu n'obutamujjamu bwesigwa, kubanga ggo amazima gafuula omuntu ow'ekitiibwa, omuzira, eyesigibwa era ow'eddembe.
22. ***Okwewala okunenyanenya ennyo*** mu buli ky'olabye n'okukkakkanya akikoze, kubanga bulijjo okunenyaanenya okunji okwabuli kiseera kuleeta obusungu ate olw'obusungu nekusigawo obulabe era nekuleeta okuwulira ebinakuwaza. N'olwekyo omuntu ow'amagezi

omwegendereza teyemanyiiza kunenyanenya banne mu buli kamu akanene n'akatono, wabula abateerawo ekisonyiyisa (excuse). Ate singa ddala wabaawo awetaaga okunenya nekubeera kw'abukakkamu era mu mukwano.

23. ***Okukwana emikwano emirungi***
emirongoofu egirina empisa ennungi era ensonga eno yeemu ku nsonga ennene erabibwa eri abantu abalina empisa ennungi n'okutebenkera kwazo mu mitima.
24. ***Okufa ku njogera n'abantu*** n'engeri gy'atuulamu mu bantu, nga n'empisa omuntu zateekwa okw'ekuuma mu kwogera ekisooka kw'ekuwa ekitiibwa ayogera n'oba nga omuwuliriza ate n'otamukutula mu byayogera (n'otamusala kiriti) oba okumulimbisa kukyamazima kyayogera oba okumukakkanya mu byayogera, oba okusituka n'omulekawo nga tannamala kwogera. So nga era nemukutuula omuntu ow'empisa bw'aba ayingira eri banne nga ayagala okubeetabamu atuule nabo, asana okuba nga atoola salaamu nga tannabayingiramu era nebwaba abafulumamu. N'okwefunza mu kutuula n'abalala bafune webatuula n'obutasitula muntu mu kifookye mwatudde ate yye n'atuulamu, era tayawula

wakati wa batudde yye kubatuula wakati okujjako nga amaze kufuna lukusa okuva gyebali, era n'obutassaawo kaama kabantu babiri nga ow'okusatu temumutaddemu.

25. ***Okuyitiriza ennyo okusoma ebyafaayo*** bya nabbi (S.A.W) kubanga ebyafaayo bya nabbi (S.A.W) binyonnyola oyo abeera abisomye ne bimuwa ekifaananyi ekisinga okubeera ekinyonnyofu mu kumanya embeera ey'obuntu gye yawangaaliramu era ne bikulunganya ku mpisaze ezaali ezettendo mu bulamubwe obwa bulijjo
26. Era n'okutunulako mu byafaayo byaba swahaba abeebitiibwa Allah asiime kubbo.
27. N'okusoma ebitabo ebiyigiriza empisa kubanga bizuukusa omuntu ne bimuyigiriza empisa ennungi era ne bimujjukiza obulungi obuli mu kweyisa obulungi era ne bimuyamba okuzifuna ate ne bimwewaza okweyisa mu nneyisa embi era ne bimunnyonyola obubi bw'enkomerero y'okubeera n'emize emibi, so nga era bimuyigiriza amakubo g'alina okukwata okusobola okwejjamu emize emibi.

والحمد لله الذي بنعمته تتم الصالحات

EBIRIMU

| | |
|--|----|
| EMPISA MU BUSIRAAMU | 3 |
| OBUBONERO OBULAGA..... | 11 |
| EMPISA ENNUNGI | 11 |
| EMPISA Z'OMUBAKA (S.A.W) | 14 |
| AMAZIMA | 18 |
| OBWESIGWA | 21 |
| OKWETOWAZA | 22 |
| ENSONYI | 24 |
| EMIZE EMIBI | 26 |
| Obulyazaamanya..... | 26 |
| ENSAALWA | 29 |
| OKUTTIRIRA..... | 30 |
| OKW'EKUZA N'OKWEMANYA..... | 31 |
| ENSONGA EZIYAMBA OMUNTU OKUFUNA EMPISA. | 33 |